

## САНАЛ ХУРААХ КУМУЛЯТИВ АРГЫГ ХЭРЭГЛЭХ ЖУРАМ

1.Хувьцаат компанийн төлөөлөн удирдах зөвлөл /ТУЗ/-ийн гишүүдийг санал хураах кумулятив аргаар сонгохтой холбогдсон харилцааг энэ журмаар зохицуулна.

2.Кумулятив аргыг хэрэглэхэд хувьцаа эзэмшигчийн эзэмшиж буй энгийн нэг хувьцаа нь компанийн дүрмээр тогтоосон ТУЗ-ийн нийт гишүүний тоотой тэнцүү саналын эрхтэй байна.

3.Хувьцаа эзэмшигч энэ журмын 2-т заасан саналаа ТУЗ-ийн гишүүнд нэр дэвшиж буй нэг нэр дэвшигчид бүгдийг нь, эсхүл хэд хэдэн нэр дэвшигчид хуваан өгөх эрхтэй.

4.Компанийн ТУЗ-ийн ердийн болон хараат бус гишүүнийг сонгох саналыг тусад нь тоолж, хамгийн олон санал авсан нэр дэвшигчийг ТУЗ-ийн ердийн болон хараат бус гишүүнээр тус тус сонгоно.

5.Кумулятив аргыг хэрэглэж, сонгогдсон ТУЗ-ийн нийт гишүүний гуравны нэгээс доошгүй хувь нь хараат бус гишүүн байна.

6.Энэ журмыг зөрчиж кумулятив аргаар ТУЗ-ийн гишүүнийг сонгосон тохиолдолд сонгуулийн дүнг хүчингүйд тооцно.

**Санал хураах кумулятив аргаар санал өгөх жишээ:** Хувьцаа эзэмшигч А нэр бүхий ХК-ийн 100 ширхэг энгийн хувьцааг эзэмшдэг. Тус компанийн дүрмээр ТУЗ нь 9 гишүүнтэй, үүнээс 3 гишүүн нь хараат бус гишүүн байхаар тогтоосон. Хувьцаа эзэмшигч А-ийн эзэмшиж буй 100 ширхэг энгийн хувьцаа нь кумулятив аргаар санал өгөхөд нийт 900 саналын эрхтэй /100\*9 гишүүн=900/ болно.

Хувилбар А: Хувьцаа эзэмшигч А нийт 900 саналын эрхээ бүгдийг нь ТУЗ-ийн ердийн болон хараат бус гишүүнд нэр дэвшиж буй эсэхээс үл хамааран өөрийн сонгосон нэг нэр дэвшигчид өгч болно.

Хувилбар Б: Хувьцаа эзэмшигч А нийт 900 саналын эрхийн 600 саналын эрхээрээ ТУЗ-ийн ердийн гишүүнээр сонгогдох 6 хүртэл нэр дэвшигчид, 300 саналын эрхээрээ хараат бус гишүүнээр сонгогдох 3 хүртэл нэр дэвшигчид тус тус санал өгч болох буюу ТУЗ-ийн ердийн болон хараат бус гишүүнд нэр дэвшиж буй эсэхээс үл хамааран өөрийн сонгосон хэд хэдэн нэр дэвшигчид дурын харьцаагаар саналаа хуваарилах эрхтэй.

**Саналыг тоолох жишээ:** “С” ХК-ийн дүрмээр ТУЗ нь 9 гишүүнтэй байх бөгөөд хувьцаа эзэмшигчдийн хуралд саналын эрх бүхий нийт 1,000 ширхэг хувьцааг эзэмшиж байгаа хувьцаа эзэмшигчид оролцон, ТУЗ-ийн 6 энгийн, 3 хараат бус гишүүнийг тус тус сонгохоор саналын эрхийг тоолно.

Хувьцаа эзэмшигч А - 100 ширхэг хувьцаа эзэмшдэг;  
Хувьцаа эзэмшигч Б - 200 ширхэг хувьцаа эзэмшдэг;  
Хувьцаа эзэмшигч В - 300 ширхэг хувьцаа эзэмшдэг;  
Хувьцаа эзэмшигч Г - 400 ширхэг хувьцаа эзэмшдэг;

Саналын хуудаст 8 иргэн ердийн, 6 иргэн хараат бус гишүүнд, нийт 14 иргэн ТУЗ-ийн гишүүнд сонгогдохоор нэр дэвшиж байна /1, 2, 3, 4, 5, 6, 7, 8, 9, 10, 11, 12, 13, 14 дугаар бүхий/.

Журамд зааснаар ТУЗ-ийн гишүүдийг сонгохдоо ердийн болон хараат бус гишүүдээр нь зааглаж, саналын эрхийг тусад нь тоолно. Кумулятив аргыг хэрэглэхэд хуралд оролцож буй нийт хувьцаа эзэмшигчдийн эзэмшиж буй 1,000 ширхэг хувьцаа 9-өөр үржигдэн нийт 9,000 саналын эрх болсон.

Хүснэгтээс харахад, ТУЗ-ийн ердийн гишүүнд 1, 3, 4, 6, 7, 8 гэсэн дугаартай 6 нэр дэвшигч, хараат бус гишүүнд 9, 10, 11 гэсэн дугаартай 3 нэр дэвшигч хамгийн өндөр оноог авч сонгогдсон байна.

Хувьцаа эзэмшигч	Хувьцааны тоо	ТУЗ-ийн гишүүний тоо	Нийт саналын эрхийн тоо	ТУЗ-ийн ердийн гишүүнд нэр дэвшигчдэд өгсөн саналын эрхийн хуваарилалт								Хараат бус гишүүнд нэр дэвшигчдэд өгсөн саналын эрхийн хуваарилалт					
				1	2	3	4	5	6	7	8	9	10	11	12	13	14
А	100	9	900	0	0	0	0	0	0	0	0		900	0	0	0	0
Б	200	9	1,800	900	0	0	0	0	0	0	0	900	0	0	0	0	0
В	300	9	2,700	200	0	600	0	300	300	0	200	0	0	500	0	300	300
Г	400	9	3,600	0	0	400	900	0	600	500	400	0	0	400	400	0	0
Дүн	1,000	9	9,000	1,100	0	1,000	900	300	900	500	600	900	900	900	400	600	300

---oOo---